

曾文正公奏稿

第三函
六冊

曾文正公奏稿

卷之二十八目錄

到任接印摺

同治八年二月初八日

舉辦永定河工片

畱臬司張樹聲清理積訟摺

三月十六日

舉劾屬吏摺

全日

果渠村估工摺

全日

勘永定河工起程日期片

四月初一日

驗收回省日期片

四月十四日

覆陳劉松山湘軍情形摺

五月初四日

覆議直隸練軍事宜摺

五月二十一日

報永定河合龍穩固摺

全日

河工撥用長蘆復價片

六月十一日

試辦撤畱長蘆總商摺

全日

永定河漫口請參處各員摺

七月初一日

永定河未能合龍片

八月二十七日

再議練軍事宜摺

銘軍統領無庸更換片

核辦永定河工程款項摺

九月二十一日

請發中洪下口歲修銀兩片

條陳長蘆鹽務摺

十一月初一日

秋收災歉未能種麥片

覆奏察看史念祖摺

十一月十九日

蘆綱億累請減成本摺

全日

報永定河合龍摺

全日

擬賑卹畿南災歉摺

十二月二十四日

陳淖沱河水患大概摺

全日

到任接印摺

同治八年二月初八日

奏爲

微臣

到任接篆恭摺叩謝

天恩仰祈

聖鑒事竊

臣

於正月十七日請

訓陞辭二十日束裝就道由蘆溝橋以下查閱永定河工程自宛平縣之南上汛至永清縣之南七汛計程二百餘里二十四日查工粗畢卽於是日西旋二十七日行抵保定府城二月初二日署督

臣

官文將直隸總督關防及長蘆鹽政印信委員齎

送前來當卽恭設香案望

闕叩頭祇領視事伏念

臣

菲材薄植久領大藩顧精力之衰頹

荷郊畿之重寄私衷惴惴若涉深淵惟早作而夜思冀盡忠而補過凡

諭旨所示飭吏整軍之道暨

微臣

所陳治河弭患之方謹當督

率僚屬次第施行明道不敢計功習勤祇以補拙庶期仰答高厚鴻慈於萬一除到任日期恭疏具題外理合繕摺叩謝天恩伏乞

皇太后

皇上聖鑒謹

奏

舉辦永定河工片

同治八年二月初八日

再臣查閱永定河見南北兩隄高於隄外之民田一丈二丈不
等高於隄內之河身不過二三尺且有河身與隄相平者兩隄
相去約三四里許中間容水之地不爲不寬柰淤塞太久河中
壅成沙洲高平堅實樹木蕃生遂使河之中泓有窄僅數丈者
水逼而無所洩則衝刷隄身處處潰決議者多思更改河道以
南隄作北隄而於南邊另築一隄臣思數百里田廬墳墓百姓
豈肯遷改且此河本挾泥沙而行徙隄數年之後新河淤成高
洲又將改徙何處即使再增巨款加培兩隄隄高而河淤亦高
是勞費而終無益也伏查乾隆年間初定章程歲修銀一萬兩

挑挖中泓銀五千兩疏濬下口銀五千兩歲修者培河上之兩隄也挑中泓者於冬春乾涸時挖河身之淤沙也濬下口者疏三角淀之尾閘也厥後雖經費屢加而辦法則仍三者并舉頗著成效近數十年以來三角淀淤成平陸而濬下口之法廢矣河身久不開挖而挑中泓之法廢矣兩法雖已久廢而部撥經費仍畱此兩款之名目臣愚以爲當此窮極思通之時宜復挑挖中泓之法每歲除五七七八盛漲之月冬臘正堅冰之月不計外其餘五箇月均可興工挑挖凡春深秋盡之時此河有水之處不過數十丈其乾涸之處尙餘數百丈挖出乾處之土近南岸者覆於南隄近北岸者覆於北隄雇車以運遙隄之上引

漕以趨新泓之中年年挑掘節節開挖河患或可少減是否有

濟

臣

擬試辦一二處續行具奏目下二三月尚有最要之工

上年南上汎決口本未堵塞南四汎南七汎兩處決口雖經堵
塞尙未開挖引河合之各處要工共估銀十一萬兩經戶部撥
山東銀三萬兩閩海關銀三萬兩均無報解消息現擬卽日興
工趕於四月初間合龍司庫銀兩因去年僅發兵餉一季刻下
須補發一季之餉別無餘款可以挪用相應請

旨敕下戶部借發銀六萬兩趕修河工一俟山東及閩海關之

銀解到卽行解部歸款

臣

因要工刻難延緩是以正月請

訓摺內卽已預爲陳明茲經詳查再申前請伏乞

皇太后

皇上聖鑒訓示謹

奏

畱臬司張樹聲清理積訟摺

同治八年三月十六日

奏爲欽奉

寄諭恭摺覆奏仰祈

聖鑒事本月十三日承准軍機大臣字寄三月十二日奉

上諭本日降旨已令張樹聲調補山西臬司直隸臬司令史念祖補授矣史念祖由軍營出身人尙明白惟未經歷地方事務是否能勝臬司之任着曾國藩畱心察看據實具奏以重地方

欽此竊

臣

履任月餘見直隸日行公事訟案居十之七八他件

不過十之二三頻年辦理軍務積壓極多督署應題之本未辦者二百三十餘件府局京控上控之案未結者一百三十餘件

各屬委審及自理之案未完者殆以萬計或延擱二三年或五
六年八九年不等吏治之疲民生之困端由於此臣與臬司張
樹聲力籌清釐積案之法日夜孜孜甫有端緒臣自誤清訟事
宜十條令司道及局員等覆核尙未刊刻完竣又囑張樹聲譔
限期功過章程十餘條臣爲之覆核尙未斟酌妥善其中最要
者直隸舊章州縣積案若干件按月有四柱冊報監禁若干名
管押若干名亦按月有四柱冊報未獲之賊瘐斃之囚按月亦
有稟報立法本屬盡善無柰虛應故事遂無成效今特令各屬
實力奉行臣督同臬司實力稽查每月將各屬報冊詳細核對
分別功過懸榜院司官廳且催且誡以冀日起有功張樹聲任

臬司四年刑名之條例已精直隸之情形尤熟臣每詢屬員之賢否巨案之源委所對多得要領若該臬司能畱畿輔佐臣不逮計一年之內可將積案全數清結若張樹聲遽赴山西臣精力衰頹自度萬不能了此數千滯獄史念祖初入仕途縱有過人之才智而欲究諳刑律熟悉地方殆非數月期年不能合無籲懇

天恩准令張樹聲暫畱直隸臬司本任助臣一臂之力將州縣

月報各冊悉心稽核俟積案清理完畢再行遷調使臣區區整

飭畿甸之志不至盡託空言亦非獨微臣之幸也聞山西刑名

案件不及直隸之半史念祖若陳臬晉省較易稱職能否勝任

似亦可由鄭敦謹察看覆奏謹將臣所撰直隸清訟事宜十條鈔呈

御覽此等告誡僚屬之文本不敢輕瀆

聖聽緣其中委曲繁難必得極熟之臬司乃可相助爲理伏乞聖明垂鑒至張樹聲所撰限期功過章程臣核定後亦當附鈔呈奏其中微有變通舊例者俟續奏時再爲聲明所有欽奉寄諭緣由恭摺覆奏伏乞

皇太后

皇上聖鑒訓示謹

奏

舉劾屬吏摺

同治八年三月十六日

奏爲特參劣員整飭吏治恭摺仰祈

聖鑒事竊

臣

於正月十七日請

訓摺內具陳直隸劣員風氣甚壞必須大加參劾以儆官邪荷
蒙

聖慈垂鑒履任以後密札藩臬兩司令將府廳州縣各員開列
優者一單劣者一單面呈商辦而清河道官直隸最久亦令就
所見所聞開單密呈以備參劾旋據盧定勳張樹聲等先後呈
送清單分注考語臣詳加核對與臣在途在京所採訪者大致
相合足見直道之公古今無異秉彝之好遠近攸同而月餘以

來接見羣僚賢員亦尙不少差喜所見勝於所聞但令彰瘡之
無私可冀風氣之漸轉茲就劣蹟尤著者甄劾十一人開具清
單恭呈

御覽雖鑒衡未必允當然在臣實已博訪周諮不敢輕聽浮言
不敢稍涉成見此外尙有十餘人訪察未確俟兩三月後詳細
推求再行據實具奏重者仍令罷斥不致同罪而異罰輕者予
以自新略示大誠而小懲其兩司單開之賢員與臣所訪各單
相合者亦分作兩次進呈

御覽此次所開十員略注考語不過表其政績並不稍乞
恩施古來循良之吏或有璽書褒異非必歲歲遷官人人進秩

也近世各省保舉浮濫習見不珍該員等雖無獎拔之實而循聲達於

聖聰卽光寵逾於華袞應請

敕下該部無庸調取引

見俾得久於其任專心民事幸甚所有特參劣員整飭吏治緣由恭摺具奏伏乞

皇太后

皇上聖鑒訓示謹

奏